

Minister drs. Marisol Lopez-Tromp:

Centro hubenil, Centro Ortopedagogico a haya un directora nobo

STA. CRUZ -- Centro Ortopedagogico di Aruba ta un centro hubenil cu ta duna opvang y cuido pa hobennan cu problemanan grave di conducta. Ademá e Centro Ortopedagogico ta ofrece hobennan un actividad diario útil (zinnolle dagbesteding) cual ta duna un contribucion real cu ta hisa nan oportunidad pa un existencia comunitario independiente. E Centro Ortopedagogico ta consisti di tres diferente unidad, cualnan ta e unidad habri (open afdeling) cu awor aki ta situa na Adrian Lacle Boulevard den cual e muchanan tin mas libertad pa drenta y sali. E guia ta leve y asina cu renovacion di edificio di ex - klooster di Imeldahof termina, lo muda ey. E unidad semi cera (besloten) ta na Dakota y e guia ta mas hopi y e muchanan tin menos libertad pa drenta y sali. E unidad cera (gesloten) lo ser construi na e mesun sitio na Dakota. Aki e muchanan ta bay tin hopi control pa drenta sali y e guia lo ta hopi pisa. Gobierno a anuncia vacatura pa un puesto di director di nos Centro Ortopedagogico. Despues di un procedura di seleccion riguroso, Gobierno a nombra den puesto di directora, drs. Carlien Anet Nijbroek. Drs. Carlien Anet Nijbroek ta un profesional naci na Aruba y a gradua na Universidad di Nijmegen na aña 1979 den Klynische Psychologie y tin mas di 29 aña di experiencia den e sector sico-social na Hulanda. Diahuebs, 18 September 2008 Minister drs. Marisol Lopez-Tromp a reuni cu drs. Carlien Nijbroek GZ sicologo BIG reg/ sicologo NIP. Su titulo di BIG reg ta garantiza cu drs. Nijbroek mag di haci diagnostica y duna terapia y su titulo di NIP ta garantiza su calidad profesional a base di su añanan di experiencia. E encuentro a bay bon. Minister drs. Marisol Lopez-Tromp ta desea Carlien hopi exito cu su trabao nobo na Centro Ortopedagogico. E trabao di maneha un centro ortopedagogico ta uno hopi duro y cu ta exigi hopi esfuerzo, pasion y dedicacion especialmente un centro ortopedagogico nobo cu ainda ta den su fase inicial. No obstante esaki, e trabao di un centro ortopedagogico ta un necesidad grandi y campo social tin hopi tempo ta boga pe pa mehora e situacion di algun hoben den nos sociedad. Ya caba a drenta aanmelding pa e centro tuma mas hoben. Pues cierto hobennan di Aruba cu ta bini den contacto cu husticia door di a comete un hecho condenabel tabata carece di castigonan penal, suficiente cuido social y recursonan pa guia e hobennan aki. E centro ortopedagogico aki lo mester cumpli cu e necesidad aki dunando un enfoque sistematico cu ta sostiene e desaroyo di e hobennan aki. Segun informacion Stichting Reclassering & Kinderbescherming nos por haya un bista bon y concreto riba e gravedad di e problema di hobennan cu ta drenta den contacto cu husticia aki na Aruba.

Tabla 1: Categoria di Edad di Hobennan cu a drenta den problema cu Husticia

Edad di Hoben	2003	2004	2005	2006
11/12 aña	-	--	-	-
13/14 aña	6	3	2	1
15/16 aña	14	24	28	28
17/18 aña	16	30	39	37

E cifranan di 2003 no ta totalmente representativo pa e aña pasobra no ta tur caso a keda registra e aña ey. E cantidad di hoben cu ta drenta den contacto cu husticia pa mas cu 3 aña ta mas cu 30.

Tabla 2: Delitonan mas Comun

	2004	2005	2006
Robo	13	20	27
Robo cu violencia	10	11	3
Robo arma		3	
Violencia Publico	10	6	11
Menasa cu arma	7	6	8
Intento di Asesinato		4	12
Participacion den crimen organiza			11
Complice den delito cu a causa morto			9

Obviamente e yudanza existente prome cu apertura di e Centro Ortopedagogico no tabata suficiente. Pues, cada vez Aruba tabata haya su mes cu un aumento di e cantidad di hoben delincuente, aumento di e variacion di delito cometi pa hoben y un aumento di cantidad di hoben delincuente di 15-18 aña. Sin un centro ortopedagogico un hoben asina mayoria biaha ta termina riba caya sin bista riba un bon futuro. Un centro ortopedagogico mester duna hobennan cu problema di conducta e guia adecuado.







ACCIDENTE



NOTICIA



DEPORTE



POLICIAL

Cell: 731-1303
e-mail: noticiaturdia@hotmail.com

Pa Cualkier NOTICIA yama nos!